

Der. I. Titel des andern Tractats

Von gelyhner barschafft

sol dheim genieß empfangen werden.

¶ By disen fällen setzen vñ ordnen wir/das der then der gelt/win/korn oder anders hinly het/nicht dan die houptsum vordern vñd nemen/also das er gelychlich dheim gewin noch übernuß/kein schécke noch vortail/we der er noch die sinen danon emphaben sol/wer das nit halt/der sol straff bar sin als vmb ein wücher/dan lyhen vmb barschafft sol ganz vergebens beschehen.

Bezaltung sol mit gutem

gleichem werde beschehen.

¶ Es sol aber der schuldnere mit gleichem vñd also gutem werde bezaltung thun/als im gelyhen ist/wilt er aber win/korn/oder anders mit gelt zahlen/das mag er thun/die werdung sol aber geschetz sin/nach der zit daer in die bezaltung geschehen sol.

Welcher frembd gelt in des

herren oder in sinem eigen namen lyhet.

¶ Wir setzen vñd ordnen auch/welcher frömbd gelt/win/korn/oder anders in des rechten herren name vßlyhet/so mag derselb herr solich schuld vordern/ob es glichwol im onwissend oder onbeuelh geschehen ist/wenn aber einer frömbd gelt oder anders in sinem eignen name vßlyhet/ist dan die gelyhen hab vorhanden/die mag der eigenherr vordern/wer sy aber verthon/so hat der herr dheim ansprach an den entlehner/aber der lyhet ist dem herren deshalb pflichtig gnüg zethun.